



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**09 Novembru 2022**  
**Parlamentu Nasionál**

**JSMP husu PN aprova proposta orsamentu adisionál husi MP, DP,  
PSIK, KAK, SFJJ no PDHJ iha OJE 2023**

Komisaun A Parlamentu Nasionál halo ona audénsia públiku ho entidade sira instituisaun públiku Estadu nian hodi rona sira nia hanoin kona-ba planu orsamentu kada instituisaun hirak ne'e nian ba tinan 2023 no mós progresu ezelesaun orsamentu jerál tinan 2022.

Iha audénsia ne'e, representante sira husi instituisaun lima ne'ebé marka prezensa hanesan Ministériu Públiku (MP), Defensoria Públiku (DP), Polisia Sientífika Investigasaun Kriminál (PSIK), Komisaun Anti Korrupsaun (KAK), Sentru Formasaun Jurídika no Judisiária (SFJJ) no Provedoria Direitu Umanu no Justisa (PDHJ), hato'o sira-nia preokupasaun kona-ba pakote orsamentu ne'ebé presija tuir planu orsamentu annual instituisaun ba tinan 2023 nian ne'ebé la inklui iha proposta Governu nian iha Komisaun Revizaun Orsamentu hodi implika ba implementasaun atividade sira instituisaun lima ne'e nian ba tinan 2023, liuliu iha verba bens serbisu nian no kapitál menór tanba ne'e instituisaun hirak ne'e propoin ba deputadu sira atu halo proposta adisionál.

“JSMP konsidera orsamentu adisionál husi MP, DP, SFJJ, KAK, PDHJ no PSIK importante atu Parlamentu Nasionál konsidera no aprova, nune'e bele tulun instituisaun sira ne'e hodi hala'o sira-nia serbisu ho di'ak no efetivu liután iha área justisa nian tuir planu serbisu ne'ebé sira iha hodi bele aseguara asesu ba justisa formál ba ema hotu iha Timor-Leste”, dehan Diretora Ezekutiva JSMP Sra. Ana Paula Marçal.

JSMP mós hanoin katak ho vontade di'ak husi Parlamentu Nasionál hodi kontinua apoiu atividade serbisu sira setór justisa nian liuhusi aprovasaun ba OJE nu'udar meu ida ne'ebé bele tulun instituisaun sira ne'e atu funsiona ho di'ak iha implementa sira nia atividade.

Alende ne'e, iha parte seluk, apoiu orsamentu ba setór justisa nu'udar meu ida atu reforsa programa reforma setór judisiáriu iha Timor-Leste hafain Parlamentu no Governu finaliza serbisu lezislasaun sira iha setór judisiáriu nian hodi kontinua fó apoiu

orsamentu atu hatan ba nesesidade ne'ebé lei ejizé ligadu ho rekursu umanu, infraestruturá no sira seluk tan ne'ebé setór justisa persija.

Proposta orsamentu ba Ministériu Públiku nian ba tinan fiskál 2023 ho nia total miliaun \$5,475,170.00 no proposta adisionál husi Ministériu Públiku nian ho total \$1,146.520.00 iha verba kapitál dezvoltamentu hodi halo konstrusaun ba edifísiu foun iha munisípiu Manufahi.

Proposta orsamentu Polisia Investigasaun Kriminál (PSIK) ba tinan fiskál 2023 ho nia total miliaun USD\$2,158,942.00 no proposta adisionál husi PSIK nian ho total \$1,896,272.00 hodi finansia instalasaun PSIK iha munisípiu sira bele antede kazu sira ne'ebé kabe ba kompeténsia PSIK nian tuir Lei Nú.9/2022 Lei Organizasaun Investigasaun Kriminál.

Proposta orsamentu Komisaun Anti Korrupsaun (KAK) ba tinan fiskál 2023 ho nia total miliaun \$2,158,942.00 no proposta adisionál husi KAK nian ho total \$282,000.00 iha hodi priense rekrutamentu ba asistente téknika internasionál ba elaborasaun estratéjia luta kontra korrupsaun, konfigurasaun ba dados deklarasaun interese, rendimentu no bens no mós rekrutamentu ba asesór internasionál ba apoiu teknicamente ba material kona-ba rekolla prova iha âmbito investigasaun krime korrupsaun.

Proposta orsamentu Provedoria Direitu Humanu no Justisa (PDHJ) ba tinan fiskál 2023 ho nia total miliaun \$1,803,241.00 no proposta adisionál husi PDHJ nian ho total \$216,000.00 ne'ebé sei fahe ba verba sira iha kustu viazen lokal iha verba kapitál monitorizasaun kampaña eleisaun no eleisaun hamutuk \$120,000.00, \$81,000.00 ba kontrata asesór nasional na'in 2 no \$15,000.00 ba akizisaun ka sosa *laptop* 10.

Entretantu Proposta orsamentu adisionál ba Defensoria Públiku ba tinan 2023 ho nia total \$100,000.00 ne'ebé sei fahe ba halo kompra nesesidade ekipamentu sira ne'ebé husi Defensór Públiku persija bainhira halo transformasaun Defensoria Públiku nia Estatutu sai Instituisaun Independente ne'ebé la tutela ona iha Ministériu Justisa.

Enkuantu husi proposta adisionál husi Sentru Formasaun Jurídika no Judisiária (SFJJ) nia orsamentu ba tinan fiskál 2023 ho nia total hamutuk \$153,600.00 ba vaga sira ba rekrutamentu Majistratura Ministériu Públiku no Ajente Defensoria Públiku hamutuk 40.

Instituisaun hirak ne'ebé komisaun A halo ona audénsia durante lora 4 mak Prezidente Repúblika, Gabinete Primeiru Ministru, Sentru Nasionál CHEGA, IP, Serbisu Apoiu Sociedade Sivíl no Audiória Sosiál, Ministru Estadu Prezidénsia Konsellu Ministru, Ministru Asuntu Parlamentár no Komunikasaun Sosiál, Ministru Justisa, Ministériu

Administrasaun Estatál, Tribunál, Ministériu Públiku, Defensoria Públiku, Komisaun Anti Korrupsaun, Polísia Sientifika Investigasaun Kriminál no Komisaun Funsan Públika.

Atu hetan informasaun liutan favór kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Website: <http://jsmp.tl>  
[www.jsmp.tl](http://www.jsmp.tl)

Rua Beco Lakateu, Aldeia Manufuik,  
SukuColmera, Administrativu Vera Cruz  
Dili Timor Leste  
PoBox: 275  
Telefone: 3323883 | 77040735

[www.jsmp.tl](http://www.jsmp.tl)  
[ana@jsmp.tl](mailto:ana@jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl